

ISLAMONLINE TAVORIX

Тарих



**Кийим ва ташаббух масаласи**



Бир неча йилдан бери баъзи мажлисларда русча фўрма киймак ва «ташаббух» масаласи хусусида узун мубохасалар бўлуб, баъзан бу мубохасалар мунозаъа ила тамом бўлурки, бир неча мартаба кўзимиз ила кўрдук. Мажлисдаги зотларнинг барчаси авом синфидан бўлса эди, биз аларнинг сўзига ахамият бермас эдук. Лекин бир узр сабабли фўрма кийганлар хакида акфор хукмларини аксар вақт мухтарам уламомиз огизларидан эшитармиз. Фўрма кийган нари турсин, хатто уйининг тагини пол ва устини тунука килганларни ёки уй ичида устал, устол, суврат каби нарса кўйганларни акфор килинур. Бу масала хакида Туркистоннинг хар бир шахрида доимо мубохасалар бўлуб турадур.

Баъзан жаридаларга ҳам ёзиладур. Агар филвокеъ фўрма киймок ила ёинки озгина ташаббух ила одам кофир бўлаверса, бул сувратда мусулмонларнинг холи мушкул бўлур. Чунки замон ва маданиятнинг иктизоси биз, Туркистон мусулмонларини фўрма киймокага ва олати мадания истеъмол этмакга мажбур килиши табиийдур. Чунончи, биз бу кун ўғлимизни шахар мактаби ва гимназияга кўймакчи бўлсак ёки бир неча йилдан сўнг Туркистон мусулмонларидан аскар олинса, ул холда, албатта, русча фўрма, шапка киймок мажбурий бўлур. Хозирда бу икки холнинг аввалгисини кўруб хам мажбурий суратда кабул килуб турубмиз. Замони келганда, иккинчисини хам кабул килсак керак. Энди келайлук жузъий ташаббухлар масаласигаки, бу: курси (устул)га ўлтурмок, кошук ва чинкича истеъмол этмак, медал такмок, хавонинг иссиглиги учун бош ялангоч ўтурмок каби шайлардан иборатдур. Агар бу жузъий ташаббухлар илада киши кофир бўлаверса, бас, ер юзида бир нафар хам мусулмон колмаслиги лозим келурки, бу мумтанеъдур. Чунки замоннинг мурури ила баъзи расм ва одатлар доимо ўзгаруб турадурки, бу ўзгариш бобомиз хазрати Одам замонидан бери вокеъ бўлуб келмокдадур. Мундай расм ва одатлар ичида фойдали ва яхсиси бўлганидек, ёмон ва зарарлиги хам бордур. Чунончи, бурунги замонда исрофлик тўй ва аза ва базми жавон каби ёмон одатларимиз йўк эди, сўнгра пайдо бўлди. Кабул этдук. Эмди мунинг кулидан осонлик ила кутула олмай турубмиз. Агарда мундан сўнг ёмон одатларни ташлаб, анинг ўрнига дин ва дунёмизга фойдали одатларнинг кабули садрига тутунсак, бу тўғруда шариятимиз хам монёъ бўлмаса керак. Максадимиз шарият нуктаи назаридан кийим ва ташаббух масаласини баён этмак эдики, бу хакда ўз тарафимиздан хеч нимарса демай, собик Миср муфтиси уламои шахир мархум Мухаммад Абдух хазратларининг берган фатвосини тубанда ёзмок ила иктифо килурмиз. Мушорун илайхи деюр: «ишляпа» ва «шапка» ва бошка Оврupo кийимларини киймок шарияти исломияча хеч бир зарарлик эмасдур. Яъни шаръан мутлако дурустдур.

Мунга инкор килувчилар, суннати расул, тарихи умматдан хабарсиз одамлардур. Буларнинг далиллари хам «Ман ташаббаха бикавмин фахува минхум» хадисидур. Холбуки бу хадис баъзи улуг олимларнинг сўзига караганда, заиф хадислардандур. «Мавзуъат ул-кубро лилалламатини аш-Шавкони рахматуллохи таоло» хар холда баъзи заиф бўлмаган такдирда хам буларнинг максудига далил бўлмайдур. Маа мо фийх шунинг ила истидлол этарлар, тўгриси, истидлол этган кишиларга таклид этарлар. Холбуки, бу хадиснинг маъноси бутун боппрдур. Мундаги ташаббухдан мурод ўзга динда бўлган халкнинг динларини ва ахлоки динияларини улуглаб, ани яхши деб ўхшамокни тиламакдур. Йўк эса аходисда собитдурки, расулимиз саллаллоху алайхи васаллам румлар жуббасини, кисрои тайласонларини киюбдурлар («Мирокот ул-мафотих», жилди аввал, сахифа 341 ва соир) ва асхобил киромга хам шундай кийимлар кийганлари учун хеч нарса айтмабдурлар. Ва «Сахиhi Муслим» да «Расулуллох саллаллоху алайхи васаллам хинд мажусийларининг бошларига киядурган икки кулотрти нарсаларини кийган» деб шарт этилмишдур.

Ва «Мезони кубро» китобида хам Имом Моликнинг мажус подшохи хадя этуб берган «кулок»ни кийганлари зикр килингандур. Асхоби киром шахарларнинг фатхи учун турли ерларга таркалганда кайси шахарни олсалар, шул шахар халкининг кийимларини кийгандурлар. Хатто баъзан насоро кизларини никохлаб олгандурлар. Магар хазрат Умар разияллоху анху «Ижоби маслахат» учун зиййи аъожим (ажамлар зиёфатини) ташлангиз, деб амр ёзибдурларки, мундан максадлари ташаббухдан сахланмок эмас, балки «кибру таррафа»га сабаб бўлмасундур. Тарихга карасангиз кўрарсизки,

хулафодан ал-Мансур Биллох мусулмонларга куффорлар кулохлари каби кулохлар киймокга амр этган ва мунга хеч ким инкор этмагандур. Демакки, «ман ташаббаха»дан мурод «ташаббух фил-либос вал-хайъат» эмасдур. Йўкса, пайгамбаримиз ва бурунги диндошларимизнинг шундай бўлмоклари лозим бўладур. Агарда кийим киймок умури шаръиядан бўлса эди, бу тўғрида пайгамбаримизга мутобаат этмак вожиб бўлур эди. Холбуки, бизлар киядурган либосларнинг кўбиси пайгамбаримиз кийган либосларига ўхшамайдур. (Ушбу хусусда сўз кўб эди. Бул ерга мухтасар килинди.)

Махмудхўжа Бехбудий

«Ойина». 1914 йил 14 июнь. №34